

## SIARAN BERITA

### **Undilah Sekarang untuk Peserta Akhir Malaysia dalam Cabaran Video Demokrasi**



#### **Kanak-kanak Malaysia dalam video Linus bertajuk “Democracy is you.”**

Kuala Lumpur, 19 Mei 2010 – Inilah masa untuk MENGUNDI dan menyokong rakan senegara anda. Pembikin filem Linus Chung telah dipilih sebagai peserta akhir Cabaran Video Demokrasi 2010 untuk video luar biasanya yang bertajuk, “*Democracy is you*” (Demokrasi adalah kamu). Jika video beliau mendapat undi terbanyak di Asia Timur, Linus Chung berpeluang berkunjung ke New York, Washington D.C. dan Hollywood pada bulan September 2010 dengan perbelanjaan yang ditanggung sepenuhnya oleh pihak penganjur. Beliau dan lima orang pemenang utama lain dari seluruh dunia akan berpeluang menyaksikan video mereka ditayangkan di tayangan-tayangan gala dan berpeluang berjumpa selebriti-selebriti dalam industri perfileman dan televisyen di Amerika. Semuanya terserah kepada anda untuk menentukan pemenang hadiah utama di <http://www.youtube.com/democracychallenge>. Pengundian dibuka sehingga 15 Jun.

Pembikin filem Linus Chung, yang berasal dari Sarawak, telah terpilih sebagai salah seorang daripada tiga peserta akhir kategori Asia Timur untuk video pendek beliau yang asli bertajuk “*Democracy is you*.” Pegawai Hal Ehwal Kebudayaan Kedutaan A.S. Nicholas Papp mengucapkan tahniah kepada Linus dan berharap beliau berjaya ke peringkat akhir pertandingan ini yang ditaja oleh Kedutaan A.S. dan Jabatan Negara A.S.

Video Linus Chung berbicara mengenai demokrasi melalui pandangan kanak-kanak di taman permainan. Beliau menekankan nilai-nilai kepelbagaian kaum, perkongsian serta keamanan dan perpaduan. Dalam video itu, salah seorang budak lelaki berkata terdapat banyak perkara yang tidak betul dalam dunia hari ini tetapi boleh diperbaiki. Demokrasi adalah harapan.

Linus Chung memberitahu Kedutaan, “saya harap rakyat Malaysia akan menonton video saya dan mengundinya di YouTube untuk memberi saya peluang mewakili Malaysia. Negara Malaysia bertuah kerana menikmati suasana aman dan perpaduan melalui kepelbagaian tetapi kita tidak harus alpa dalam mempertahankan demokrasi kita. Sebagai permulaan, kita perlu mendaftar sebagai pengundi; dan

memilih pemimpin yang baik. Kita semua perlu bekerja ke arah merealisasikan kempen 1Malaysia demi kita semua dan anak-anak kita. Cabaran Video Demokrasi adalah platform hebat untuk berkongsi nilai demokrasi Malaysia kepada dunia. Malaysia, contohnya, menikmati kemajuan dan pertumbuhan kerana keharmonian pelbagai kaum.”

Dalam menceritakan pengalaman beliau memasuki Cabaran Video Demokrasi, Chung berkata, “apabila saya mendengar mengenai cabaran ini, hati saya terus terdetik untuk membuat sesuatu. Demokrasi adalah konsep yang mudah tetapi amat berkuasa. Saya memutuskan untuk membuat video yang saya harap dapat mendidik kanak-kanak mengenai nilai-nilai demokrasi. Pada masa yang sama, ia mengingatkan orang dewasa seperti kita betapa pentingnya kita semua mempertahankan demokrasi. Lagi pun demokrasi itu adalah ...kita!”

Presiden Eksekutif KRU Studios Norman Abdul Hakim, yang juga rakan kongsi utama Cabaran Video Demokrasi di Malaysia, mengucapkan tahniah kepada pembikin filem muda ini kerana kemahiran dan kreativitinya dapat mempromosikan semangat 1Malaysia di pentas dunia. Norman juga gembira dengan 28 entri filem yang telah dihantar untuk cabaran kali ini – satu jumlah yang melebihi negara-negara Asia lain kecuali Indonesia.

Linus Chung menghadapi saingan sengit daripada pencabar-pencabar Malaysia lain untuk mara ke pusingan separuh akhir pada bulan April 2010 yang menyaksikan tiga video berentap di tempat teratas. Juri bebas di Washington D.C. telah memilih peserta-peserta akhir di seluruh dunia termasuk tiga peserta akhir Asia Timur dari Malaysia, Indonesia dan Singapura.

Untuk mengundi video Linus Chung (atau video peserta akhir lain), sila layari <http://www.youtube.com/democracychallenge>. Jangan lupa mendaftar masuk YouTube menggunakan kata laluan YouTube atau Google anda untuk mengundi. Jika anda tidak mendaftar masuk, undi anda tidak dikira. Ingat, anda hanya boleh mengundi satu video dalam masa satu hari. Jadi silalah ke YouTube dan undi video Linus bertajuk “Democracy is you”.

Selamat Berjaya Linus. Malaysia boleh!



*Peserta akhir Cabaran Video Demokrasi Malaysia Linus Chung bersama Norman Abdul Halim dari KRU Studios.*